

TADIDI



X-.291

Tboli

TADIDI

(An abridgement of
Ethel E. Wallis'
Tariri: My Story)

OVERSEAS MISSIONARY FELLOWSHIP
PUBLISHERS
1983

Text in Tboli
adapted from the Book
TARIRI MY STORY
by permission of Harper and Row
New York, N.Y., U.S.A.

17.75-583-1.025N 42.150P-833030N
Printed in the Philippines

Preface

This is his own story Tariri, a fierce chief of the Shapra people living in South America, in that country of Peru.

The ancestors of this chief were all killers, their work was to destroy and that was also Tariri's work. Then two white ladies lived in their midst and learned the Shapra language. When these ladies had learned the Shapra language, then they translated God's Word into the language of the Shapra people and Tariri came to believe and his character became changed. Beginning with his believing (faith) he no longer killed nor did he do the things he had formerly practiced from his ancestors such as witchcraft and he became very patient and was no longer fierce.

Tariri's story has now been translated into Tboli for you to think about as for you. This story of Tariri was written in Tboli by Gadu Ugal and edited by Bedung Gendulan, Walan Tuan and Silin Wanan.

Loken

Ni se yem kun tulón Tadidi, sotu datù lóbô bè yó kem tau Safda, nù fi leged Amidika yem kul benwu, glem lem yem sotu benwu bong boluyen Fidu.

Yó kem fuen nim datù ni hono kem tau monok, són gemlà gel nmò le, ne yó se kun gel nmò Tadidi. Ominen wen kem lewu libun mlikan bukay nù lem blóng le bè yó ne dnalang le yem udél kem tau Safda. Timbow deng tilob kdalang le du yem udél kem tau Safda, ni kem mlikan bukay ni, omin le mili Udél Dwata ebè yem udél kem tau Safda, ne baling hemtahu Tadidi, baling megetles kmoen.

Tódô mbut bè kehtahu Tadidi lâ bud nmoen du ne yem monok ne yó kem dê tehe hentahuhén lemwót bè yó kem kul sfu lumun sbulung, mton bû, imò ne baling manay ne nawan là buden lóbô.

Ni deng nili ebè udél Tboli yem kun tulón Tadidi mò kuy nit nawa se kuy. Yem tulón Tadidi ni, Gadu Ugal fen smulat du bè Tboli ne bud hetngel me se ke Bedung Gendulan, Walan Tuan ne Silin Wanan.



Tadidi

Ou Tadidi

Ou se yem bnoluy le Tadidi, ou se gunu le kmulu yó kem tau Safda. Gu laanu là deng hemtahu bè Dyisas Kdays ni se kmoen yem dou klowil.

Bélê me teganay, kaem Seitan yem senflós tendo gunu me hemtahu. Ke wen gemnóm des bélê me laen kô dumu gunu me mni tóbóng, tek són bè yó kem mtulus gu talak tonok, honéen bè yó kem sowu. Sotun, bè yó kem tau mton bù gel tmaba bè yem sowu. Tey bong boluyen bélê me abay se són lu se fen tendo gel tmóbóng kum anì mkó des me. Sotu gel nmò me, gel hinum me él bakù yem tau wen desen anì mkó desen abay se yó se sotu bulung kun. Tu se koni tehe kmoen yem tehe kum adat, balù udì ke wen tngón me bè yem hol ktahuen. Balù ou tehehe gel mulung abay se tehehe mton bù snéen dou.

Yó kem tehe fù me són yó gunu le menwu són hilol yem tey él bong boluyen Yokontadi. Tek són yó klowil le són dmulok ne mò hngalaf ne mnigef. Yó gel nit le dmulok boho. Sotu ali gel nmò le, hmatay tau, ne gel nit le mulék

kulu yó kem tau hnatay le. Yó boluy dou
témê Tutaldiki. Du se sotu gunu le kmulu yó
kem tau lóbbô, deng tey dê ne kulu kenlengen.
Sok gel dmulok tehe témê sal gel nwtien tehe
mà, gel toloken dmulok ne kmò kekleng kulu
tau.

Yem Tolok Mà Dou

Yó boluy dou mà, Nasumata. Tey bong kadat le
du abay se du se fen geta mogot yem kum badyu.
Sotun gunu le alì madat du bè yem alì deng
dê kulu tau kenlengen. Tek sôn du se tendo
lolò yó kem tau bè kum badyu.

Bè yem hanà kegenu udì, tey tendo gel kehlau
mà dou. Gel monen, Hol te gel temgama anì hol
tekuy kemgis elem hulin kdaw ne anì là likò
tekuy. Yó se mò kmò tekuy anì angkat tekuy
baling tau malak ne nadat le tekuy yó kem dumu
tau datù. Sotun, gel toloken dou yem kmò gel
kbeles. Yó se koni yem tehe tendo gel tolok
mà dou.


Mi se yó kem tau Safda, ne yó gel hohon me yó
kem tau Hibado ne kem tau Akwales. Deng tey dê
ne hnatay me bélé le ne deng tey dê se hnatay

le bélé me se kum. Sok wen bélé me ne e gel mngayaw sal le sket mit lewu buyus, ne balù yem hanà kudì me sana eles ktolok le kum hmatay tau, ngangen ne efet me lebang. Yem hanà kegen me lomi lemnok sal gel nit le mi mngayaw. Sok wen tau ndek le buyus okóm là tagad hlós hnatay le du, sal gel dók le mi kem ngà nò hemlós hmatay yem tau deng ndek le buyus. Nì se yem adat tolok le kum, ngangen baling tóóó adat me ne baling laen dù klikò me hmatay tau.

Kdalangu Kemleng Kulu Tau

Balù yem mà diu toloken ou snéen kemleng kulu tau. Kum kesfu se yem kemleng kulu tau abay se yó kem tehe fù me sal gel wen tmlok kul snéen yem kmò kekleng kulu tau. Gel mon le ke kenleng ye kulu tau bê ye kenleng bè liholen, là hyuhen, hol senfek ye bè but kuluhen, yó se yem hyu. Tolok le kum snéen yem kmò któgó me kulu tau anì hol sles anì hyu lemieg du. Yó se gel tolok le kum.

Yó gel kmò me yem wek yem tau hnatay me gel snofil me. Nmò me hilet ne gel bud bkes me bè kum wek snéen. Bélé me yem tau gel mngayaw ne gel nit le mulék kulu yem tau hengayaw le



bong geta boluy le bélê me yó kem tau yó.
Hol néen ke ket kiwólen mit kulu mulék yem
tau mngayaw, kaem du se yem lemyu bè kem dumun,
ne du se yem all sensadat le, ne du se gunu le
kmulu kem dumun tau. Ou se yem all nadat kem
tau abay se tey deng dê ne tau kenlengu kuluhen
ne gel nitu mulék, abay se monem lemwót bè
yó sem deng tehe gel dnalangu lemwót bè kem
tuhahu. Balù yem là hol kum kwen ewenem sana
ne me e kngayaw ne e kemleng kulu tau, ngangén
ne kól bélê me snafang.

Sotu kdaw fat me mogot snafang ne me e genlà
yó kem tau Hibado, abay se ne me e bneles yem
tuha logi lewu le ngaen tehe bnonok le. Timbow
me kól ditu là bud le nù bè yó deng le
mlóy, ngang me mò kul efet ton me lu. Timbow
ton le mi lu gna tminggal kum okóm laen dù
tódô bélê me. Omin me malà kul ne gotu le
tódô ne gotu le matay. Tey bong kehuy nawaw
abay se yem hol geta bélê le deng ghatayu.
All deng dê se kun tau kenleng kuluhen nim
datù le ni.

Yó se yem tendo kum gel nmò. Laen kô dumu
nmò me sôn mngayaw ne e kemleng kulu tau. Yó

gunu me gotu hmatay kem dumu tau anì laen dù
bud hmatay kum.

Ksut Yó Kem Tmolok Udél Dwata

Timbow deng legen bè yó ne, wen sotu weu sut
béléu boluyen Biktolino. Nim Biktolino ni
tólóng tau bélê me. Là tauhen Safda se
kun, okóm hulung du yem kum udél. Yó nen e
tulón dou, monen, Wen kem Mlikan Bukay mógów
edini ne le e nù lem blóng ye. Timbow gungolu
yem monen yó, hlóbbé, abay se là móyóe ke
wen tólóng tau nù lem blóng me. Ne monu,
Teđu hol henduf le yem kógów le yó? Déke yó
henduf le, monu, kô ne le e nled tonok me. Olo
Biktolino kmuli, monen, Là tngón te du, déke
yó henduf le. Són mou hemdem du ke bo teđu
hol henduf le elem blóng me yó kem Mlikan
Bukay yó.

Sotu kdaw bud sut béléu Biktolino, monen, Hono
kem libun tu kem Mlikan Bukay tu. Mógów le
elem blóng ye ne le e tnóbbóng yu. Ne bud
snólóku, monu, Teđu hol henduf le du? Bud mon
Biktolino, Yó nógów le ne le e tmolok bélê
ye Udél Dwata. Ne wen nes nit Biktolino,
ominen ma du ne blayen dou, monen, Ni se nes

hwit le ebéléem anì moi gunù bélé le kun.
Étey, monu, eles tulónem dou ne yem angat nmò
le sok le kól kni. Bud mon Biktolino mò dou,
Yó kun nógów le ni, ne le e tmlók bélé ye
Udél Dwata. Okóm tolo megewu nawa me hendem
me, déke kéng Biktolino, deng gel gungol me
bè kem fù me snéen ekni nim mon le Dwata ni.
Hendemu na tódô hnénég ne hnungol kihu tolok
le tekuy. Ne mon Biktolino, Hyu ke lumun yó
kmò kehedemem, nem tódô hemdà bélé le
gunù, monen.

Tahu se hemdà me bélé le gunù. Timbow gefet
ne yem kdaw kegdek le, lemwót me mung me ke
Biktolino ne me e senlong lu, lan me smakay
ówóng bè yem tey él boluyen Modona. Timbow
me gefet mon Biktolino, Yó lu. Tódô gungolu
se yem tey muni lemungkul miwes ta me ominen bud
mdef lem él yem tey muni lemungkul yó koni, ya
tey ketngahu du yem mon le ówóng móyóng.
Lumun tô ktonu du lumun tô kafal ne lewu
tihen, sotun lumun se ke tô onuk wen hafaken.

Ominen heklol kilil koni yem ówóng yó, ne
tonu hewà gu lemen lewu libun. Lori Anderson
boluy yem sotu fen Doris Cox yem sotun. Yó
boluy me ke Lori, Momtsansi, fen boluy me ke

Doris, Mofawatsi. Tey le bukay ne wek le là sengeden bè yem kum. Tódô me teneng hménég kul. Ya tey tendo ketngahu kul. Timbow gloni béléú Momtsansi ne Mofawatsi, kmuli le ebéléú, okóm mom olohu tódô teneng dou mdà bè yó. Omin le mkem lem hólólu. Tey bud ketngahu bè yó abay se là kum adat du yem skem lem hólól. Yem kkem le lem hólólu yó koni tódô kem hlungoyu ne hólólu abay se là hulunge du yem skem lem hólól ne tódô bud kó le snéen. Ya tey ketnga le se kul ni kem dou dumu. Ya tey sidek klikò me, kéng tó kehedem me du angkat nmò le mi hesek abay se deng dê ne gel gungol me bè yó kem tau nmò le lu hesek.

Omin le gotu ma yó kem nwit le, ne mon Biktolino mò kum, wót kuy ne, tnóbóng kuy lu. Tahu se tnóbóng me lu, ne gotu nwit me lu mulék ne mung le se kum yó kem lewu libun.

Yem deng kegdek le lem blóng me, yó hendem me yake tódô me gotu mlóy abay se tey tólóng yem kul kmò. Ou se yem hol hihol bè kem tau okóm là kô tngónu du mò atulu. Sotu hendem me, mon me déke áwata le, ngem yem wek le tey tólóng mton du. Ne mon me mò ke Biktolino,

Dwata le kô ni kem tau ni? Ne monen se, Sindu, là kô le dwata, lu se yó kem tau mon le Mlikan Bukay. Moen du ke mógów le edini, monu. Là, mon Biktolino anî ne le e tmolok bélê ye Udél Dwata. Okóm ne le na gna dnalang yem kuy udél, omin le tmolok kuy. Uu, mon Biktolino, fen tmóbóng kul bè kdalang le yem kuy udél.

Ke tnóbóngem lu, monen, bud tnóbóng le u snéen, abay se tey dê bulung le mò hkô yó kem dê des ye. Bè tanay kinum me bulung tey klikò me, hendem me déke milu me du. Okóm kogolen bè yó tngón me tey wen tóbóngen kum yem bulung sok wen des me.

Kbut Me Mngàì

Ngangen ne nbut le dmalang yem kum udél. Tey tô kóyô le hol tô mudél yem kum udél yem deng kdalang le, okóm tolo alî sigol kmò kudél le du. Okóm tódô henlelu tmolok kul yem kum udél, abay se kóyóu se ke géhél le hulung mudél bè yem kum udél.

Sotu hol tanay hnénég me bélê le, gel le kudung ne hidong le ne wen gel udél le yem igò



Tadidi ne Momtsansi

le ndong. Timbow deng malù glolò le ne yem kum udél, omin le yó tmulón du kum yem lanen yem gel kkudung le igò le mudél. Mon le, Gel me mai ebè Dwata. Nim Dwata ni, mon le, du se nifil tekuy. Ne tey kbong nawan tekuy. Yó gunum mon dnalang me yem kuy udél, anì yó tolok me kuy yem Udél Dwata. Yó se koni mon le Momtsansi. Balù yem là dang hol keglolò le du yem kum udél, ewenem sana tando ktilon le du kum yem Udél Dwata. Bè kbut ktolok le kum bà udì ke getnef me lanen yem gel tolok le kum lemwót bè Dwata ne bè Dyisac Kdays. Ne hendemu, monu, Tedum hol kmoen ni du? Tedum hol bótóng muhen mnì du?

Sotu kifu mógów le ebè gunù yó kem dumuhu ne me minum, ngang me minum efet me gotu lengel, ngangen efet me mom gotu sfatay. Ya tey klikò le Momtsansi ne Mofawatsi bè yem nmò me yó, botong le mlóy ne le e hebnos lem dlag.

Timbow deng hlafus bè yó koni tey kudél tuha libunu dou, yó boluy tuha libunu Idines, monen mò dou, Laen dù yakem kò bè tu kem Mlikan Bukay igoen hol lumun ke kóm fes lówó tu kem libun tu. Négem, monen, deng le mom mlóy likò le. Nbuten ni, mon tuha libunu, béen wen

bud minum bè ni bè gunù. Ke móyô ye minum tódô nit ye mayuk. Yó se koni mon tuha libunu mò dou ne tey sidek kyaku. Ne ominu mon mò kem dumuhu, Olò tenflok tekuy hlengel minum déke deng mom wen bélê tekuy wen bagien. Yó se koni monu mò kem dumuhu. Omin me tmaba kul le Momtsansi ne Mofawatsi, tahu se, bud le mulék.

Deng le malù legen ne le Momtsansi lewu le Mofawatsi tódô senflós le tmolok du kum yem Udél Dwata.

Sotu kdaw bè yó tnaba Mofawatsi ou, monen, Tey kóyôu géhéi tmulón du kuy yem Udél Dwata ni, monen. Hnungol ye, wen tulónu kuy lemwót bè Dyisas Kdays. Nim Dyisas Kdays, monen, tódô blayen yem kun lówó mò bayad yem kdê salà tekuy. Abay se monem tódô kdê tekuy. gotu gemsalà, laen dù tau là gemsalaen. Ne yem kdê tekuy gemsalà, gotu tekuy megtafak mò bayad yó kem salà tekuy lem lanaw ofi, okóm Dyisas là móyóen ke gógów kuy elem lanaw ofi. Yó gunu Dyisas tódô mlay yem kun lówó mò fen megtafak ne matay bè salà tekuy, ne tódô bayaen yem kun lówó bè yem ktutuk le du bè kôos. Ne ndek le buyue talak loboken ne

tey gamà litóen, yó se mò bayad yó kem
salà tekuy. Omin le lembeng du lem kilib, mon
Mofawatsi, okóm bè getluhen kdaw bud btik, ne
bud mulék ebè longit. Duhén yó, yó se
hemtahu béléen là megtafaken okóm gutahen
klowil laen dù sónen, ne angkat hlós nù bè
Dwata efet laen dù sónen. Yó se koni tulón
Mofawatsi dou.

Ngangen ne malù tô gtukulu udì yem gel
ktulón le kum Udél Dwata, ne malù wen
kligalu, ne monu, Tey yó kô yem nmò Dwata.
Tódô senflós le ne tmulón kum yem Udél
Dwata ne lel le gel smulat du bè klatas snéen
ne ou se yem fen gel tmóbóng kul gel smulat
yem Udél Dwata.

Sotu kdaw wen senlawu, okóm igoen wen desu
kulel se kwen tau mógów ebéléu, ne sôn ou
fen tendo semgyok kul. Suloy le buteng klengel
minum, ne sôn moen minut leed ne yem desu.
Tisbow deng allì leed ne, móyóe ke wen tau fen
demsù béléu bè yem desu, okóm kenbé
Momatsansi yem tô dsù yó koni, monen, Là
móyóen du Dwata myó ke yó dum mian bè
nawam. Okóm monu, Kunen ne blaem deng tey leed
ne nim desu ni, ni ne kmou du, monu, ne sónen

ni ne kmou du. Tngónu tey sídek kegnóm
Momtsansi du, okóm mom dendelu hedsù ebè
dwata kéng.

Deng dê ne halayen sôn mou tendo hmunqol yem
tolok le kum. Sotu gel tolok le kum yem kógów
Dyisas te éi ne yem ketefloken yem tey lenos,
ne yem gel kehlowilen yó kem tau deng matay,
yó se gel tolok le kum. Sotun gel tolok le
kum, mon le, Kibu hemtabu bè Dyisas Kdays, ne
sónen du ne tendo nimónen, angkat benlay Dwata
klowii laen dù sónen yem tau yó, ne angkat
hlós nù bè Dwata bè longit yem tau yó. Yó
se yem gel tolok le kum. Ngangen ne tngónu yem
Dyisas Kdays laen kô là gbeken du, okóm tolo
tey megewu nawaw hemtabu bè Dyisas Kdays.

Sotu kdaw tnaba Mofawatsi ou, htóbóngen ou
mili yem Udél Dwata. Tahu se, mógówe etu new
e tnóbóng. Sentulón me yem kbaling te ngà
Dwata syan ke hemtabu te bè Dyisas Kdays. Ke
són du nimón te ne lolò te henbaling Dwata
tekuy kun ngà. Nbuten bè yó sôn mou hemdem
du, monu, Hentahuhu ne kô Dyisas Kdays mni,
anì sôn kun udél ne nimónu ne laen dù bud
dumu lolou, sôn du. Okóm sóól nawaw mon du
lolou Dyisas, hendemu ke lolou Dyisas kmò sem

gel kngayawu du ne e gel kemleng kulu tau, là
bud nmou du kô? Yó hendemu ke là bude gel
mngayaw mon kem tau balinge gok, ne là mǎyô
le ke béléu bud gunu le kmulu. Yó hendemu,
kóyôu ke sôn ou yem hol geta gunu le kmulu ni
kem tau ne bong le likò dou. Okóm sôn mou
tendo hemdem du yem gel mon le angkat wen bud
klowil hulin kdaw. Yó hendemu, monu, hyu dé
ke sôn Dyisas lolou ne sôn kun hlau lolou,
anì henbalingen ou sotu bè yó kem ngaen ne
anì angate hlós nù béléen. Yó se yem nù
lem hendemu.

Kbalingu Hemtahu

Sotu kdaw bè yó new e mebel utón, ðmuloke
nmou. Timbowe bud mulék henmung tnaba
Mofawatsi ou, monen mò dou, E Wog, nem mógów
edini kun. Tahu se, mógówe etu. Okóm teye
myak abay se lomihe kól gu lem ðlag, ne tey
litô iwas te kwangu, iwas gentiu. Monu mò du,
Yake naw gna ðyo dé ominu mógów edini kedeng.
Okóm monen, Omin he. Tahu se myóne, ne nbuten
tmulón dou yem Udél Dwata. Ne monen mò dou,
E Wog, kilón ðe kóyóem hbaling ngà Dwata?
Bnalau se monu, Ni ne kehbalingu ngà Dwata. Ne
yó omin me mni bè Dwata, ne monu mò ke Dyisas

Kdays, Ni béléem ne gunuw loqot ne sôn kóm
udél ne nimónu, hol nolobea dou kdê salau, ne
là bud nmou du ne yó kem sidek zehe gel nmou,
nbutu ne mò du yó kem hyu lemwót béléem.
Yó se koni yem monu ebè Dyisas Kdays. Tódô
lenwóten bè yó ne sôn du ne tendo nà lem
hendemu tendo gel hefedemen dou ket kdaw yem
kóyô hmoen dou.

Là Móyón Dwata Ke Melese

Tódô lemwót bè yem deng kehtahuhu tódô
tinof kegnómu du baluen ke wen mgel sut
béléu. Okóm sotu kdaw bè yó lemwót
Momtsansi lewu le Mofawatsi, mógów le ebè yem
sotu badyu gunu le gotu ston kdê yó kem dumu
le Mlikan Bukay. Kogoi le lemwót, wen tau sut
bélê me lemwót le sentu badyu me. Tólóng
se yem kul badyu okóm sdumu kem tuha me. Mon
tuha libunu, Ilang kô ne le e gemlà yó kem
tau yóó? Ê, là, monu, kaem dumu le mà yó
kem tau yó. Ominu hotun kul ta ne tô hyónu
lu, okóm là kô le móyô myón. Timbow
hnénégu lem mata le, ya tey sidek ketngel le
ebéléu. Tngónu wen sidek ne le e nmò.
Ominu hlóy yem ngau elaan.

Tóddô tonu se snafang tayà le dou, ne gungolu se muni letsà, okóm là btuen yem snafang tô tinggal le dou. Ne monu tey tóbóng Dwata dou. Tóddô bud gungolu se muni btù bud tninggal le ou, okóm là hendemu du mlóy. Ne tonu se kbonok le ke fógu.

Hol tô knolutu se ubat lem sningu tô balahu yem snafangu tóddô bud gungolu se muni btù tninggal le ou, tóddô gnómu se kfuhu, lumun ke deng gotu gebà, ominu yó ne lemwót mlóy, tóddô gotu sut lem baku litô ne gu lem ilungu, okóm tóddô henlelu mlóy. Klawihu mlóy tóddô senflósu mni bè Dwata, Dwata, Mà bè longit hol tnóbóngem ou. Blaem wen se kem tau semketes dou, okóm là dog henlós le du kemtes dou. Ngangen són moen sudù nawaw igou mlóy, mlóye etu dlem klokok él bè gunun nù twolihi Sowinki. Monu mò ke twolihi, Nitem ou ebè yem sotu weu. Mni te tóbóng béléen. Tahu se, kól me ditu kendel hsakayen o ówóngen nen e eted o bè gunù mulung.

Sut bè yó snéen yem sotu weu okóm tau Hibado kun, monen mò dou, Hatayem nim haliem ni abay se tey leed, ne monu se, Ke tnóbóng Dwata ou

là hatayu du. Tódô senflósu mni bè Dwata
ani hol tnóbóngen ou.

Gungol Momeansi ne Mofawatsi yem gfau, tódô
keabal hangay le ou bè ówóng nýwóng ani ne
le e kbulung ou. Tey kbulung le dou, ngangem ne
denga ówé hys ne bude mulék. Yó se gnuuhú
gungól du yem tey tóbóng Dwata dou. Denga
sana gungól ni ke tehe là tóbóng Dwata dou.

Okór bà nsoem yó, tey sidek kélés nawaw kul
yó kem tau tminggal dou. Yó hendemu na gotu
gungól ni ke kem tau ta na gotu genbà yem badyu
le mò belesu yem nndè le béléú. Okór tendé
gel mndéú béléú Dwata, monen. Bà, hém nndè
yó. là nyuhem ke yó nnoem. Deng tehe tulónu
ke Dwata se ani són du ne nimónu. Duhem yó
koni yem hendem tô kbelesu tódô lana lem
hendemu. Ne mon yó kem tau monok, Nénégem
Tadidi, là kóen meles abay se bong nawan ke
Dwata, lumun tô deng matay Tadidi, mon le, là
kô lumun du yó tehe kmoen ekni igoen hol
dandón tau monok. Tey deng megetles ne, mon
le, ni kmoen ni abay se Dwata temles du. Yó se
yem gel mon le gbak ebéléú.

Sotu kdaw bè yó miwes Kasawinki bè yó, du se tehe dumu yó kem tau tehe tminggal dou, Mon le mò dou yó kem dumuhu, Tu bnonok tekuy tau tu mò beles yem tehe nmò le bélê tekuy. Yó, monu, lemwót tekuy. Yem klawi me lemoldò kemtes ke Kasawinki sòn moen sut lem hendemu yem Udél Dwata, là hyuhen ke melesi ne là hyuhen ke monoki. Blaem deng tehe tulónu ke Dwata, monu sònen du ne lolou ne bée bud hmatay tau. Hendemu ke bude tò monok ni moe kéng bè Dwata. Yó se koni yem tendo sut lem hendemu. Ominu mon mò yó kem dumuhu, Bê tekuy abay hnatay tau tu. Tódò kenfò tekuy ne eted tekuy ebè tu kem sendalu anì lu he tmenes du lem blanggù.

Tahu se, kenfò me Kasawinki lewu le yem dumun Kumfasdu. Ya tey sidek klikò le hendem le bnonok me lu. Okóm monu mò kul, là hnatay me kuy, okóm eted me yu bè tu kem sendalu. Ne nit me mulék yehen Kasawinki ne kem ngaen. Ya tey kedlumu le ofol kul ke gotu hnatay me lu.

Omin me mit kul le Kasawinki ebè tu kem sendalu, mon me, Ni knukub ye ni kem tau nii deng le monok. Ya tey kehkode kkik le Kasawinki ne yó kem fes lówóhen. Monem anì là hnatay

me kul. Yó monu mò kul, Lemwót bè kehtahuhu
bè Dwata là kô gbeku du bud hmatay tau. Bê
ye hlikò, monu, là kô hnatayu kuy. Moen du,
monu, ke tniggal ye ou ne moen ke hnatay ye
fógu?

Tey sidek, monu, yem nmò ye, okóm senced se
là kóe meles abay se là kóyô Dwata du. Mon
Kasawinki, Là kô ou du tminggal kóm ne hmatay
ke fógem, olohu mung kul dou.

Mudél yem tau geta bè kem sendalu, monen, Là
du du hol tahu tminggal là dog tenesu kul ne
lem tum gunù blanggù lamang. Tódô knukubu
lu kni ne. Ne monu mò yem geta bè yó kem
sendalu, ke lumun se yó tódô ou ne kmukub kul
kem tau ni. Tahu se, mimón yem tau geta bè
kem sendalu. Tahu se nwit me Kasawinki ne yem
dumuhèn ebè yem baɗyu. Són ou gmastu kul,
abay se mon Dwata kenbongem nawa yó kem
hohonem. Tey klikò le dou là kô le dog
móyô mken, okóm monu mò kul, Bê ye hlikò
bà yem khatay ye yem sotu dumuhu okóm là kô
ne me e hnatay kuy, abay se wen Dwata.

Yó kegen me kmukub kul lewu bulón le, ne
tódô senflósu se tmulón kul yem Udél Dwata.

Yó ne, mon Kasawinki, hyu ne kô ni ke mulék me ebè kum badyu? Anien se ke mulék ye, monu, deng geblaen ni ne kdalang ye. Okóm hol nból ye yem Udél Dwata deng tulón me kuy lem blóng kem dumu ye. Ke là mlanen bè hlau Dwata, monu, là kô ne e lumun du ni kmò me kuy. Omin me hewót kul le Kasawinki ya tey kligal le.

Yó Kem Tey Dê Mgel Sut Bè Klowil Me

Tódô lenwóten bè yem kehtahu me bè Dwata yem tey dê mgel sut bélê me. Sotu kdaw semlaw yem sotu ngau. Lemwót Momtsansi ne Mofawatsi ne le e bnulung, okóm senged klefen snéen. Baling deng mom tey sidek ne kehedemu ebè le Momtsansi, hendemu monu, là gfaen matay he nim ngau ke tehe là nù le kni le Momtsansi yem kbut kwen des nim ngau. Okóm bud gehedemu yem Udél Dwata tendo senflós gel gungolu, ne bud hendemu là hyuhen mni ke wen tô sidek nù lem hendemu. Ne yó bud sut lem hendemu monu, Tilów Dwata dou nim kwahen nim ngau, hnénégen ke là tebelu du yem kehtahuhu. Ngangen ne bud gemnóm des yem sotu ngau malù bong senta yem gna matay, bud bnulung le Momtsansi, nan tô malù myón okóm bud mlef snéen.



Tadidi ne kem fes lówóhen

Ya tey sidek kegnóm me du, ne tnuen du yó kem tau ali mudél, mon le, Yó se gutahem bè kehtahuhem yem Dwata yó. Igoem sem mon du hemtahuhi, moen se yó du kem ngaem ke gotu le matay? Hnénégem he, mon le, kà gotu le matay yó kem kdê ngaem. Mom hyu bélê me laen kô hemen me, mon le, abay sem là hemtahu me bè Dwata. Deng mom yó ne hendem sut béléu monu, tebelu ne nim kehtahuhu bè Dwata. Okóm bud gehedemu yem tehe kun gfà Dyob, yó kem sfold ngaen gotu le matay, ominen yó bud mgel nawaw. Ne yó bud hendemu tilów Dwata dou nim ni. Ominu yó bud mni bè Dwata, aní bud benlay Dwata mi ngà, ne aní yó bud wen kligal me, yó koni yem hnihu balù yem deng tô kkogolu ke Dwata.

Tey sbeweg snéen kun kegnóm du tuha libunu. Kóyóen ke là buden hemtahu bè Dyisas Kdays, okóm tey tilob kestulónu béléen, monu mò du, Angat wen he yó ngà bud blay Dwata kut, béem nili nawam. Kaem deng le nù bè Dwata ne tu kem ngà te deng matay tu. Yó gunum mon, monu, béem bud lenangag lu ne. Tahu se, timbow deng malù bud legen bè yó bud wen mbut bè tuha libunu, ngangen ne sut yem ngà ne logi, ya

tey kligal me abay se hnungol Dwata yem kni me.
Tey hyu yem Dwata abay se blayen kum yem gunun
temnù kehtahu me, okóm là sòn du yó he yem
mgel sut béléu.

Sotu kdaw bè yó igò me mógów tódô gungolu
tey uni koyu hugón. Tódô tonu koyu hugón
sebià ebéléu. Sòn mou mebel tô gunuw e
hkaak blaem wen tau dumuw takô gna dou, ne wen
ohu huli dou. Tódô keng tlesem bè tehe
gunuw mdà koni yem koyu yó. Sòn yem sotu ohu
huli dou hisok bè yem koyu yó. Bud lemwót
bè yem tey tóbóng Dwata dou yó gunuw là
hisok bè yem koyu. Sòn mò Seitan tô móyô
hmatay dou okóm là kô hlus Dwata dou.

Sotu kdaw snéen wen desu, yó desu tenawe.
Udì duen gunuhu là matay, tey kegenu sòn mou
hlilil denge mom tey lehen. Okóm tódô
senflósu mni bè Dwata anì hkóhen dou yem
desu. Tahu se, mkó desu ne bud hyu kegnómu
du. Hendemu, monu, ni se yó kem mgel sut
béléu mò gunu Dwata mton yem hol dou kehtahu
abay se yem mgel sut bélé te mò gunun gfan ke
gtebel te yem kehtahu te duhen ke là.

Wen sotun gunu Dwata tmafak dou lanu mimón yem monen mò dou yem tau gel demsù ebè dwata kéng. Bè yem kdaw yó msõe koyu, ne gedfi ebè tihu yem beyung. Ya tey genged haliu, tódõe kefuteng, tek udì gunuw là hto bà mon litô. Bud lemwót bè yem któbóng Dwata dou yó gunuw bud mowil. Hendemu yó se tafak Dwata dou lanu kóóm mimón yem monen mò dou yem tau demsù ebè dwata kéng.

Yem Gel Toloku Yó Kem Ngau

Bè yem dou tehe kegen udì yó kem tehe gel tolok mà dou, són mngayaw ne e kemleng kulu tau, ne són bè kbeles. Okóm dou ni kmoen ní, són yó toloku yó kem ngau són yem kmò kestulón ebè Dwata, ne yem kmò khógów le klowil le. Abay se là móyóen du Dwata kun lumun tum tehe tolok mà do. Ne toloku kul snéen yem kmò khogot le klowil le anì són Dwata ne snalig le. Balù kihu nmò le ne balù kihu gunu le esolu na le na mni bè Dwata ne hni le yem kun tóbóng. Ne gel hnauhu lu là mduk snéen anì là hduk le.

Sotu gel toloku kul ke wen des le, monu, hol bê
ye abay mni tóbóng bè yó kem tólóng tulus,
són bè Dwata dé gunu ye mni tóbóng.

Sotu gel toloku kul, monu, Bê ye likò matay,
abay se yem tau hentahu ke mlef tódô hlôs
ebè Dwata, tódô hlôs nù bè Dwata efet laen
dù sónen.

Sotun, monu, ke sidek kna ye bê ye hentahu yó
kem lanen. Tódô tulón ye ke Dwata. Tódô du
ne beangón du ke wen yó kem kna alì sidek
knikò ye, monu, tódô gotu tulón ye ke Dwata
ne là kô ne e hgefet Dwata du yem lanen.

Sotu gel hlahu kem ngau, monu, Tey hyu ke
wngi ye anì hulung ye semfala yem Udél
Dwata, abay se, monu, són yó se tmolok tekuy
hol mò du yem tedeng nim tolo lel kuy tolo nù
talak nim tonok ni.

Udélu Ebè Yó Kem Tau Deng Wen Udél Dwata Bè
Kul Udél

Yu kem tau deng wen Udél Dwata bè kuy udél
hol ye hligal, abay se yem Udél Dwata hlò
ktahuen yem kun tulón. Tulónen kut snéen
yem mò kmò te du yem kut klowil ni kmoen ni,

dalang se yem mò kmò te du elem hulin kdaw.
Tódô senflós tekuy mimón ke Dwata abay se
là kô gbek te du ke tô te hlayuk béléen.
Anien he ke hendem te tô hebnos lem kilib
senged nóm kton Dwata tekuy.

Yem Udél Dwata toloken kut kmò khenek te nawa
te, ne kmò ktebel te kul yó kem nmò sidek.
Tódô hol gel hennagi tekuy yem Udél Dwata
anì wen gel tolok tekuy kem dumu tau. Dwata se
yem kemgis senta tekuy. Angat kól yem kdaw
gotu kehdaen kdéen tau bè soluhén. Lemwót
yó kem là hemtahu le bè Dyisas Kdays gotu
sentifun le lu mung bè Seitan ne sù le lu lem
tafak laen sónen. Wen kô kgis tekuy anì gbek
tekuy kembê du sok angat tñafaken tekuy?
Semblów. Hyu ke gmung tekuy béléen anì là
angat tekuy megtafak hulin kdaw. Ni se tulónu
kuy lemwót béléu. Ou se yem kuy dumu setwoli
bè kehtahu bè Dwata.